

## DE AQVIS ODORATIS.

Von wol rüchenden Wassern / so man zum  
Schmuck vnd Zierath braucht.

Nym Citronen Blüht vnd destillire das Wasser daraus j. Maß/darzu  
thue Rosmarin Blüht ein halb Pfund/Rosen von Jericho einhalb  
Pfund/ Ambræ j. scrupl. Bisem ½ scrupl. vnter einander gemischt/  
vnd in balneo lind davon destillirt/das giebt gar ein liebliches vnd  
wol rüchendes Wasser.

## Aliud.

Nym Rosen-Wasser/ gieß es wiederumb vber frische Rosen/ vnd destils  
lire es noch ein mal/ also/ das es viel kräftiger werde/ als zuvor/ dar-  
innen solvir hernach ein wenig Bisem vnd Ambra.

## Aliud.

Nym Rosen-Wasser zwei Maß/darunter gieß 4. Loth Zimmet-Wass  
ser/ vnd ein scrupl Bisem/ so wird es gar ein liebliches Wasser.  
Merck / der Bisem sol vorhin in einem Mörsel gar wol abgerieben  
seyn/ vnd hernach mit dem Wasser vermischet werden/ so reucht es  
lieblicher/ als wenn man den Bisem wil mit destilliren / denn in der  
destillation verlieret er oftmals seine Krafft/ vnd wird schwächer.  
Man mag den Bisem auch wol in den Helm hengen/ das die Kräfte  
des Spiritus durch ihn gehen/ so werden die Wasser gleicher Ge-  
stalt wolrüchend vnd lieblich davon.

Ein Mineralisches liebliches Wasser zu destilli-  
ren/ das dem Ambræ an dem Geruch zu vergleichen ist/ vnd  
die Nasern vnd Flecken vnter dem Gesicht vertreibet.

Nym Ungarischen Vitriol j. Pfund/ thue dazzu acht Loth Salmiac/ der  
zuvor